

Medel: «Europako espazio judizialak giza eskubideak bermatu behar ditu»

Europol-en giza eskubideen urraketari aurre egiteko neurriak aztertu ditu



Medel elkarteko ordezkariak atzo eskaini zuten prentsaurrekoan.

Gorane Agirre / Bilbo

◀ **Etorkizuneko Europako espazio judizial komuna sortu beharra aldarrikatu zuen Medel elkarteak atzo Bilbon egin zuen bileran. Era berean, espazio berri horrek «herritar orok justiziara sarbidea izatea, giza eskubideen defentsa, eta botere judizialaren independentzia» bermatu behar dituela nabarmendu zuen.**

DEMOKRAZIA eta Askatasunaren aldeko Europako Magistratuen Elkarte (Medel) bere urteroko bilera eta *Europol* eta giza eskubideak gaiari buruzko lan jardunaldia egiten ari da egunotan Bilboko Justizia Jauregian.

Medel Europako Kontseiluaren kontsulta organoa da. Elkarte duela hamalu urte

sortu zen Estrasburgon, eta Europako hamar herrialde baino gehiagoko epaile eta fiskalen elkarteak biltzen ditu, besteak beste, Fiskalen Batasun Progresista eta Demokraziarako Epaileak. Azken horren Euskal Herriko saila da Bilboko egunotako bileraren koordinatzailea.

Orlando Afonso Medel elkarteko lehendakariak Europako espazio judizial komun bat sortzeko epaile europarren helburua nabarmendu zuen. Espazio judizial horrek, Afonsok azpimarratu zuenez, «herritar orok justizian sarbidea izatea, giza eskubideen defentsa eta botere judizialaren independentzia bermatu behar ditu. Hori ezin da herrialde bakoi-tzeko botere exekutiboaren esku egon».

Christian Wettinch Medel-eko lehendakariordeak, bes-

talde, Europa demokratiko eta askea lortzeko epaile eta fiskalen borroka nabarmendu zuen. Bere hitzetan, «gehiagizko presentzia ekonomiko eta finantzarioak utzita-ko hutsunea bete behar da».

Medel elkartearen beste kezka batzuk ere aipatu zituen Afonsok; esate baterako, justizia kriminala, justizia zibila eta lan alorreko justizia. Medeleko buruak nabarmendu zuenez, «lan alorreko justizia oso gai garrantzitsua da, batez ere orain Europan herrialde batetik bestera langile ugari aldatzen delako».

Bestalde, *Europol* eta giza eskubideak jardunaldian parte hartu zuen Nekane San Miguel epaileak. «Kezkagarri eta arriskutsutzat» jo zuen Europako poliziaren jokabidea, eta alde horretatik neurriak hartu beharra nabarmendu zuen.

Era berean, San Miguelek nabarmendu zuenez, «giza eskubideen urraketen egoera arriskutsua mahaigaineratu dugu; hizlarietako batek, esku-hartzaileen adostasunez, Orwellen liburu beldur-garriko *Anai Nagusia*-rekin parekatu du datorkigun egoera hori».

Balmasedako Erdi Aroko merkatuan milaka lagun izan dira

■ Herri horrek zortzi mende bete dituela eta antolatu ekitaldien barruan izan da azoka

Efe / Balmaseda

MILAKA lagun bildu zituen atzo Balmasedan egin zen Erdi Aroko azokak.

Goizeko hamaiketan zabaldu zuten merkatua, eta Erdi Aroko jantziak soinean kalejiran jende asko joan zen.

60 artisau izan ziren haien produktuak erakusten, eta hantxe bertan ere jardun zuten produktuak egiten inguratzen ziren lagunei jardura erakusteko.

Horrez gain, eltzak eta zaldi ferrak erakusten zein egur tailak egiten zutenak eta ehungileak ere aritu ziren egun osoan lanean. Lokatz gailuak, larrua, zeramika, eta perfumeak ikusgai eta salgai izan ziren.

Hori guztia ikus zitekeen gunea garaiko oihalez eta gailuz apaindurik ezarri zuten, eta herriko jende asko jantzi zen okasiorako garai hartako jantziez.

Merkatua atzo hasi eta bihar amaituko da. Merkatuak irauten duen hiru egunetan merkatariez gain, hainbat ekitaldi izango dira.

Balmaseda sortu zene- tik 800 urte iragan direla eta ari dira ospatzen hainbat ekitaldiren bidez.



EHUko Ingeniaritza Goi Eskolan 315 graduatu berri Euskal Herriko Unibertsitateko (EHUko) Ingeniaritza Goi Eskolako azken promozioan graduatutako 315 lagunek beren agiriak jaso zituzten ostegun gauean Bilbon izan zen ekitaldi batean. Graduatu berrietatik 261 Industri Ingeniaritza alorrekoak dira, eta gainontzeko 90ak Telekomunikazio adarrekoak. Ingeniaritza Goi Eskolak egin berri duen inkesta baten arabera, bertako lizentziatu berrien %80k behin betiko kontratu bat lortzen dute lau hilabete igaro baino lehen.